

編號 4 號

【渡阿婆去公園寮】李秀鳳原作

阿婆平常時撈滿叔歸家人戴在莊下，放寮日，佢會來吾屋下看佢撈老妹有較高無？有較大無？阿婆來个時節，佢同老妹會牽等厥手，渡佢去屋脣个公園寮。

這日，佢兜三子阿婆手牽手又來到公園，一頭一頭開到鬧熱煎煎个櫻花相賽展分人看靚，一群青鸛仔¹停在櫻花樹頂啾啾滾迎等人客。早春个風吹過來，雖然有一息仔清冷，毋過，好得有燒暖个日頭花晟到人歸身仔鬆爽。

公園肚个細陂塘，畜有盡多紅金鯉，還有幾隻肥卒卒仔个鴨仔泔來泔去。「阿婆、阿哥，遽遽來看！」先走到陂塘脣个老妹幹轉頭大嫵牯聲喊。佢牽等阿婆行兼去，看著一條細老鼠緊拚拚仔泔過來，同一大群紅金鯉、鴨仔搶麵包食，還生趣唷！脣頭企等个大人細子，大家都看到嘴杓杓仔。阿婆笑到嘴合毋密，講佢食到七十歲，還毋識看過老鼠仔泔水泔恁遽。阿婆教佢撈老妹唸：「阿貓牯，出門打老鼠，老鼠跌落陂塘肚。拿來煮，全家食落肚，爬床拖席²肚屎痛啊！何麼个死苦！」

行恁咁个阿婆，坐在涼亭下个石凳頂歇睏，看佢撈老妹攞等本來愛餵魚仔个麵包，扯到一細坵、一細坵仔擲在地泥下，黏皮就錫來七、八條對樹頂颯下來絡食个膨尾鼠。膨尾鼠當圖食，毋驚人，還會走兼來撈老妹討食。阿婆看到笑弛弛仔，過路人乜頓腳看到當入文。

拓拓風，老妹「哇」一聲，講「有蛇」，煞煞走落涼亭肚捕等阿婆个肚屎，驚到歸身仔緊顫。佢較大膽，行到樹頭下同佢看真兜仔，大聲笑講：「該毋係蛇啦！係山狗太。」阿婆牽等老妹行過來看山狗太緊領頭，親像撈佢兜相借問。阿婆教佢兩姊妹唸：「山狗太，恁作怪，看著人，領領拜，有時有日，分佢捉著，一片滷鹽一片晒。」

佢問阿婆：「你斷真愛撈山狗太捉去滷鹽晒日頭？」阿婆緊掌吾頭那緊講：「慧孫得事！童謠為著搭句又押韻，成時會鬥一息趣怪个字眼來錫細人仔。」

佢撈老妹最好渡阿婆來公園寮，毋單淨好搞，還做得聽阿婆講古、學唸生趣个客家童謠，三子阿婆輒常寮到毋想轉屋。

¹ 青鸛仔：音 qiang' li' e'；綠繡眼。

² 爬床拖席：音 pa' cong' ia' qia；形容非常痛苦的狀態。

編號 3 號

【姐公个紅棗細寶貝】劉純汝原作

記得對偌略略仔知人我以來，在逐年翕熱个暑假，阿姆總會渡偌轉姐公屋下。因為姐公戴在苗栗个公館客家莊，種有一大片个紅棗園，七、八月仔緊工个時節，阿公个子女都會轉來搵手。

收成趕事个逐朝晨，天正甫甫仔光，姐公、姐婆、阿舅嫲姑婆就會戴帽仔、落手袖仔、著長褲、水靴筒……全身包到好勢好勢，攞等大隻、細隻个塑膠桶仔、布袋這兜，出發去園肚摘紅棗哩！見擺，偌總係睡過迄、跔人毋著，就單淨伸著留在屋下搵手擇紅棗个份。分偌印象當深个一擺，係偌十歲該年，打早、天還旨光偌就輕手輕腳跋跣床，恬恬仔著好衫褲，在廳下等姐公佢兜。

姐婆看著偌著下驚：「啊哦，你這隻細嗶仔，日頭都還在該睡，你坐在這，做麼个呢？」

偌講：「分偌跔好無？」

姐婆應偌：「你徑手徑腳就會，棗仔樹、笏了了¹，係分佢刺著，斯會喊阿姆哀唷！大人無閒泊杈，麼人愛搭你！」

¹ 笏了了：音 ned` liau` liau`；刺很多。

顛倒係最惜偌个姐公，笑笑仔講：「毋怕，分佢跔，佢乜盡久無去紅棗園咧，共下來去看姐公个紅棗細寶貝啊！」

「新娘上轎——頭一擺」，分偌跔著哩！一入到園肚，偌就像飛出鳥籠个鳥仔共樣，暢到奈毋得，緊行緊摘、緊食緊行。哇！一把把²个紅棗，啾紅又大粒、精神飽滿；咦，偌聽著樹頂絡食个細鳥仔啾啾滾呢，佢兜鬧熱煎煎个叫聲，唱出一條條好聽个歌仔；噉，細樹極背仰會固等恁生趣个虐毛蟲呢？佢在該蠕蠕動像跳舞樣仔。還有當多毋識看過个細蟲仔，滿哪仔趟來趟去搞等園人尋。「你兜愛細義啊，毋好分棗仔笏刺著也！」看到全無瞞目个偌，好心嫲佢兜提醒，噯毋記得自家係來搵手个唷！

對識得過「紅棗王」个姐公來講，紅棗係厥細寶貝，一路里來，花盡多个心思來照顧佢兜，姐公長透講：「人勤地獻寶，人懶地生草。用心照步來做，就會打出品質湛斗个紅棗哩啲！」兩年前，姐公身體無鬆爽，既經無法度去園肚做事咧，現下个紅棗乜較歉收咧，細寶貝可能係日思夜想姐公，噯毋記得愛好好成長哩！

偌想愛嫲姐公个紅棗細寶貝深深感謝：你兜串出姐公个歡喜農場，你兜連起歸屋个幸福味緒，你兜還分偌有暢樂个童年回憶。偲兜共下來祝福姐公大寶貝，愛平平安安、康康健健！

² 一把把：音 id` pa` pa`；一串枝一串枝的。